

## Jü Carta San Pablota Jiojteri Filemóntahui

### *Teboteri*

<sup>1</sup> Pablo Jesucristota béchïbo pereeso, entok jü hermaano Timoteo, jü nákhume Filemóntate tebotua, itomak tekipanuaanta,

<sup>2</sup> entok kétchi hermaana Apia nákhuaanta, entok Arquipota, Diosta tékilpo itom jáläekamta, entok huame Jesucristota súalhuäpo náu aanim, em jóapo nau yayajame.

<sup>3</sup> Diosta tühua entok yánti éehuame enchimmaktunake, Dios itom Áchayta bétana entok itom Señor Jesucristota bétana.

### *Filemón Diostat éiya entok huatem nákke*

<sup>4</sup> In Diostane baisahueka emou huáate, oraciónim ín joä beleki,

<sup>5</sup> bueïtukne ä jíkkaja, Señor Jesucristota súaleka em ä nákéhui, entok simem huame Diosta bíchápo huélpülsi emo nüyeka jíápsame.

<sup>6</sup> Huä Diostat éehuame huatemmeu em nokäu, huitti át jünee huamta enchi máknake; ínëli sime jü tühua enchimmets ayunake, Cristo Jesússta huämi.

<sup>7</sup> Bueïtuk tüisite al-leiya, entokte jíapsi yéjtehuamta jípure, em huatem náké béchïbo; bueïtuk empo, ín saila, jume Diostau bíchaa huélpülsi jíápsame bem jíapsiham óusi éiya.

*Pablo Onésimota béchïbo jïokot jiaahuak*

<sup>8</sup> Huäri béchïbo, Cristota bétanane lütüriata jípure jíöbe, emót ín nésaunakë béchïbo, hua jita chë türik bétana,

<sup>9</sup> tëne emou jïokot jiaahua, yore nákhuahta téhuampo: ínapo Pablo béja öla, entokne pereeso Jesucristota béchïbo.

<sup>10</sup> Én éntokne ín üusi Onésimota béchïbo emou nooka, nee pereesotuk Cristota bétana yeu yoremtukame.

<sup>11</sup> Huä bannaataka kaa emou türiakaihui, të ëni emohui entok inou júne türi.

<sup>12</sup> Én éntokne júchi emou ä bíttua. Akë ä mabeta, em nee mabetäpo bénasi.

<sup>13</sup> Bueïtuk ínapo ínomak ä tahuatua péa jíöbe, enchi kara ínomak anëpo, nésauta nee ä joria íaaka, ímï cárcelpo evangeliota béchïbo pereesotaka ín anëpo.

<sup>14</sup> Tëne kaita yáa báare kaa em ínel éäpo, bueïtuk ínëli jü em tü éeri kaa útteata ä yáriä béchïbo, ál-la em júnen éäpo.

<sup>15</sup> Bueïtuk jamak íäri béchïbo au näikimtek emo bétana, jaiki huásuktiapo jáni, én éntok bát bíchaa síme huásuktiapo enchi ä mabetnakë béchïbo,

<sup>16</sup> të ëni kaa súmatata enchi tekokam ténasi, të ál-la chë junne, súmatata béppa, ä sailaka tüisi ä huáatia ténasi. Ínapone tüisi ä nákke, të jíbatua empo chë junne. Ä yoremtukä pámani, em ä nákeu türi jíöbe, të chë júne müsäla maachi, jü em ä náknakëhui, Cristota súalhuäpo.

<sup>17</sup> Én éntok ä junëlitunakey, Cristota súalhuäpo empo ínomak huëtek, Akë ä mabeta, em nee mabetä bénasi.

<sup>18</sup> Entok jítäpo júne kaa tüisi émomak tahuaka enchi huikiriätek, juka enchä huikiriähui, ínohuë ä tójja.

<sup>19</sup> Ínapo Pablo ín mámammeyne ä jïojte: ínapone ä béjtuanake. Kaa täbuiasi emou jiau béchïbo, émpë chë nee huikiriïya.

<sup>20</sup> In saila Señorta súalhuäpo, arë nee ania jäni; nechë jíapsi yétcha, jimyore béchïbo, Señorta súalhuäpo.

<sup>21</sup> Emoune jïojte, juka nésau éehuamtat ára em joäbet éaka, jünéaka chë júne ín nokäu béppa em ä yáanakëhui.

<sup>22</sup> In áma emou yebijnakehuë huéchiapo jípure; buëituk Diostau enchim buaná béchïbo júnentunake, jü áman enchim ín bínnakëhui.

### *Teboteri entok Diosta tühua*

<sup>23</sup> Epafra enchi tebottua; áapo ínomak pereeso Cristo Jesússta béchïbo.

<sup>24</sup> Entok huate két enchi tebottua: Marcos, Aristarco, Demas, entok Lucas, ínomak tekípanuame Diosta tékilpo.

<sup>25</sup> Itom Señor Jesucristota tühua enchim jíapsimaktunake. Júnentunake.

## **Mayo**

### **Mayo: Diosta nooki yorem nokpo New Testament**

copyright © 2014 Wycliffe Bible Translators, Inc.

Language: Mayo

Contributor: Wycliffe Bible Translators, Inc.

All rights reserved.

2025-05-13

---

PDF generated using Haiola and XeLaTeX on 22 May 2026 from source files dated 13 May 2025

84020f7b-8f34-5f65-803f-a2c6c92b92ea